

5. november 2018

UKA 2018/40

Kangerlussuarmi, Narsarsuarmi Kulusummilu innaallagissamut imermullu nunap sinneranut akinut naligiissarneqarnissaat pillugu Naalakkersuisut 1. januar 2019-imiit atuutilertussamik Mittarfeqarfiit aqutigalugu naligiitseqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Aqqaluaq B. Egede, Inuit Ataqtigiit)

Siumup tunngaviumik nukissiornermut politikimini anguniarpaa inuiaqatigiit aningaasaqarnerannut naleqqunnerpaamik avatangiisinullu ajoqusiingitsumik nukissiuutinik pilersugaanissaq kiisalu uuliamik isumalluuteqarnerup annikillisarturnissaa.

Innaallagissamut imermullu assigiimmik akeqartitsiunnaarsimagaluernerup sinerissami najugalippassuarnut atugassaritissimasai imaannaanngitsut Nukissiorfiup pilersuiffiini ukioq mannamiit oqaluttuaannanngortinneqarput. Tamanna sinerissami najugalinnut annertuumik qujamasuutigineqarpoq, tassami nunarput tamaat isigalugu aaqqissuussatoqanngulersoq tassaasimavoq aningaasarsiornikkut inuussutissarsiornikkullu oqimaatsorsiorfiunerpaaneersut annertuumik qaavatigut nammagassinneqaatigisimasaat.

Nunatta siamasissumik najugaqarfigineqarnerta illersorneqarnissaannik Siumumiit politikkeqarluta isummertaatsitsinnut naleqqulluinnartutut isumaqarfigaarput inoqarfiit tamarmik innaallagissamut imermullu akigitinneqartut eqqarsaatigalugit assigiimmik atugassaqartitsisarisaqartugut. Nunarpummi isorartoorsuuvoq issittorsuusinnaasaqisoq nunallu ilaani qaamaterpassuarni taartorsiorfiusarluni.

Innaallagissamut imermullu akit assigiittussanngoqqinnerannut suliamut qulakkeerneqarsimapput Nukissiorfiit ulluinnarni pilersuiffigisai. Siunnersuuteqartullu tikkuagaattut Siumumi isumaqarpugut inoqarfiit tamarluinnarmik innaallagissamut imermullu assigiimmik akeqartitsineq tamakkiisoq eqqunneqartariaqartoq, tassalu maannamut Mittarfeqarfiit pilersuiffiiniittut aaqqissuussamut ilaatinneqanngittut Kangerlussuaq, Narsarsuaq Kulusullu ilannguttariaqartut – soorunami.

Naalakkersuisut akissuteqaatiminni tikkuarpaat mittarfeqarfittut ingerlasut taakkua pingasut aaqqissuussamut ilanngutsinneqassapata akitsuutinik qaffaasoqartariaqartoq imaluunniit Aningaasanut inatsit aqutigalugu aningaasaliissuteqartoqartariaqartoq. Siumumi taakkua nalilersorluarnissaat ataatsimiititaliami sulinermi qulakkeeqataaffigisavarput, taamaattorli naqissusissavarput ullutsinni angalaniarneq akisoreeqqimmat akitsuusersueqqinnikkut periuseqarnissaq pitsaasutut salliuttariaqartutullu isumaqarfiginnginnatsigu.

Siumumiit taamatut oqaaseqarluta siunnersuut akuersaarlugu oqaatigisavarput, suliallu ataatsimiititaliami susassaqartumi suliarineqarnissaa innersuussutigalugu.

Anders Olsen, Siumut.